

EKO 2021

Esperigaj Komunikoj

Je via servo tra ok
jaroj, de post 2013

2020: rekorda jaro:
kun 60 komunikoj

Subtene al la loka,
landa, faka kaj
regiona agado

EKO 2021-33 sendita el Budapeŝto la 13an de aŭgusto

Al: Komitato, sekcioj kaj aktivuloj de ILEI, Landaj kaj Fakaj Asocioj de UEA (aliĝintaj kaj ne). Plie al la Komitato, Konsilianoj, regionaj komisionoj de UEA, TEJO-estraro, gazetaro, partoprenintoj en iuj AMO-seminarioj, aliaj listoj kaj unuopuloj. Pli ol 1500 ricevantoj. Kun plusendoj pli ol 2000.

Por tuja uzo kaj plia diskonigo inkluzive de la alkroĉaĵoj kun indiko de fonto: EKO de ILEI kaj UEA

AMO 76 altiris grandan publikon per riĉa programo

La dua Virtuala Esperanto-Kongreso de ILEI (VEKI) gastigis la 76an Seminarion pri Aktivula Maturigo (AMO), kun du temoj, traktitaj en tri sesioj en du el la kongresaj tagoj. La unua kaj tria sesio havas la temon: 'Edukado pri / al / per Esperanto-kulturo'. Tiuj okazis en la lundo kaj la merkredo de la kongresa semajno. La dua sesio frue en merkredo havis la temon: 'Efika instruado tra Afriko'

Tiu dua sesio okazis tre frue (05:00 UTC) por ebligi partoprenon de homoj en Azio kaj eĉ Oceanio. ILEI havas aktivajn sekciojn en pluraj aziaj landoj, kaj organizas siajn virtualajn kongresojn por ebligi partoprenon el ĉiuj tempozonoj. Por tiuj, kiuj ne partoprenis, la debato estas spektebla ĉe:

https://youtu.be/8Cwv_QJLL0.

La unua sesio okazis la 9an de aŭgusto tra kvar kaj duona horoj kun 61 partoprenantoj en 26 landoj tra kvar kontinentoj: Armenio, Barato (Hinda Unio), Belgio, Brazilo, Britio, Ĉeĥio, Ĉinio, Danlando, Francio, Germanio, Hispanio, Hungario, Irano, Italio, Japanio, Kanado, Koreio, Kroatio, Latvio, Nederlando, Pollando, Reunio, Rumanio, Serbio, Svislando kaj Usono.

Servo subtenata de
Universala
Esperanto-Asocio
kaj Internacia Ligo
de Esperantistaj
Instruistoj



Redaktoroj:
Stefan MacGill kaj
Mirejo Grosjean



ENHAVO

- AMO 76 kun ILEI: Unua kaj dua sesioj
- Valoraj prezentaĵoj de renomaj edukistoj
- La oka Afrika Kongreso en Tieso, Senegalo

Post la formala malfermo, bonvenigo kaj enkonduko la programo disvolviĝis jene:

Katalin Kováts: 'Strukturo kaj gradoj de la instruistaj lertigaj programoj'. Ŝi prezentis tre detalan kaj valoran statistikaron, plej interese pri la variaj niveloj de kvalifikado, unuavice de la lingvo-kapablo. Ŝi pluiris al la mondo de revoj, pri la rezultoj se funkcius por Esperanto Ministerio de Edukado, kiu starigus normojn kaj studplanojn.

Renato Corsetti: 'Lingvo monda en eŭropa saŭco lingva kaj kultura'. Li klarigis la ecojn kaj atingojn de Zamenhof kaj la lingvo. Li montris kiom forte eŭropaj kulturaj nocioj penetris en Esperantiston kaj pledis, ke azianoj pli forte kontribuu al tiu kulturo. Lia lumbilda prezento estas alkröcita.

Mireille Grosjean: 'Esperanto-kulturo en Esperanto-kursoj'. Gravus eviti stereotipojn en kurso-frazoj kaj niaj edukaj materialoj. Ŝi emfazis, ke parolantoj el aliaj mondpartoj havas aliajn stilajn manierojn esprimi sin en Esperanto kaj pledadas en IPR – la oficiala organo de ILEI - akcepti tiujn alternativajn stilojn, kondiĉe, ke temas pri nenio rekte erara. Ŝi elstarigis la valoron de 'Juna amiko' disvastigi diversajn kulturojn, pere de ĝia ege internacia reto de kontribuantoj.

Stefan MacGill: 'Esperanto-kulturo en nia edukado'. Li aliris la temon laŭ du direktoj. Unue, manierojn prezenti la kulturon laŭ la aĝgrupoj, due, laŭ la homaj sensoj aktivigataj dum la aprezo aŭ kreo de kulturaĵoj: aŭskultado, rigardado, parolo, gustumado kaj plenumado.

Sekvis fruktodona diskutado kun deko da intervenantoj. Poste, la daŭrigo:

Monika Molnar: 'Kulturkruciĝoj en la klasĉambro'. Ŝi skizis la mirindan progreson de la tute oficiala Esperanto-programo en privata, progresema lernejo 'La Granda



Ursino' en La Chaux-de-Fonds. Tiom ampleksa kaj alloga programo floras danke al la progresema karaktero de la lernejo. La kulturo rolas centre en la programo, kaj forte kontribuas al la entuziasmo de

la lernantoj, pro la riĉaj ligoj kun foraj kaj instigaj landoj. Sur la foto (de SMG), Katalin Kovats gvidas diskutojn dum la vizito de la partoprenintoj de AMO 35 (AMO-LIMA) en majo 2017.

Laura Brazzabeni: 'Instruado de Esperanto pere de la reto'. Ŝi prezentis la spertojn en la itala movado, kiu multe laboris por pretigi kaj proponi retajn kursojn, interagajn

kaj unudirektajn (nesinkronajn) kursojn, da kiuj IEF proponas du: KIREK kaj KAPE. Ŝi plie resumis la pli gravajn fontojn de perretaj suplementaj ebloj kaj rimedoj. Ŝia prezentaĵo alvenis kaj estos alkroĉita al iu baldaŭa EKO-komuniko. (Ni dissendas ilin en ordo de livero, por kuraĝigi diligentecon 😊)

Sekvis dua diskutotempo antaŭ la fermo de la unua tago de la seminario.

Ni arigadas la kontribuadojn kaj iom post iom aldonos ilin al EKO-komunikoj kaj pliposte ili ekaperos en la retejo de UEA <aktivulo.net>.

Raporto pri la merkreda sesio de AMO 76 sekvos en EKO 34 – ja ni ne volis turmenti vin per ĉio el tiu abunda materialo en unu fojo. Kiel aldonaĵo al la AMO-sesio pri Afriko, ni prezentas la sekvan informon.

Afriko denove invitas kaj kongresas

La 8-a Afrika Kongreso okazos en decembro 2022 en Tieso, 56 km. oriente de Dakar en Senegal. Oni fidas, ke pandemiaj limigoj ĝis tiam estos grandparte superitaj. Aperis la unua bulteno de tiu kongreso.

La informilo pri la 8-a Afrika Kongreso 2022 estas elŝutebla ĉe:

<https://afrika.esperantujo.io/8-ake/pdf-dosieroj/>

Jen la ligilo al artikolo en Vikipedio:

<https://eo.wikipedia.org/wiki/Tieso>

===== vortoj: 670 =====

Ĉi tiu komuniko estas disponebla laŭ la permesilo Krea Komunaĵo Atribuite Samkondiĉe 4.0 Tutmonde.
Por pli da informoj vidu ĉe: <<https://creativecommons.org/licenses/by-sa/4.0/>>.

Aperintaj komunikoj legeblaj kaj elŝuteblaj ĉe: <http://aktivulo.net/eo/content/komunikoj-pri-agado>. La prezento estas ĝisdata ĝis la fino de majo 2021 (per EKO 2021-22). Vidu ilin laŭjare, kun klaraj enhavaj indikoj por ĉiu jaro de post 2014.

ALDONU VIN: Skribu al <stefan.macgill@ce@gmail.com>. Neniu alira kondiĉo aldone al valida retadreso. Malferma al Aligitaj Membroj, eksmembroj, neniam-membroj, klingonuloj, volapukistoj, atistoj, itistoj, ujistoj, iemuloj, Duolingintoj, ktp.

SUBTRAHU VIN: Skribu al la supra adreso. Donu vian nomon, retadreson, landon kaj (se eble) la grupon aŭ kialon por via ĉeesto en la ekspedolitoj.

